

Lo haci apelacion riba Controlaria General pa crea un envolvimento directo entre Controlaria General y e maneho financiero di Gobierno. E inspeccion di Servicio Central di Contabilidad (Centrale Accountantsdienst), Controlaria General y Landsrecherche ta forma parti importante di e proceso di integridad. Banda di percura pa un staf optimal, maneho di gobierno mester ta dirigi riba sigui e recomendacionnan di e instancianan aki. Esaki ta conta tambe pa consehonan di Raad van Advies.

Gobierno lo hasi un peticion na Controlaria General pa dentro di 3 luna despues cu Presupuesto 2000 ta na vigor, entrega na Parlamento un Rapport encuanto cumplimiento di parti di gobierno cu e recomendacionnan hasi den Rapport Calidad pa loke ta toca asuntonan financiero. Y despues di esaki Gobierno y sindicatonan lo reuni pa analisa y evalua e recomendacionnan di Controlaria General.

SANCIONNAN

Teniendo cuenta cu loke ta regla den ley caba (AB 1999, no. 24 y AB 1999, no. 37), gobierno lo hasi e tramitenan legal pa facilita procedimiento civil pa recobra e daño financiero cu gobierno a sufri of pa laga ventahanan financiero di actonan ilegal bai na beneficio di gobierno.

RELACION GOBIERNO - SINDICATO

- Dentro di dos siman e ministro concerni lo invita e sindicatonan pa papia riba su maneho y e puntonan cu sindicato ta haya di importancia.
Gobierno lo sigui stimula consulta regular y continuo cu sindicatonan y tur gremio y organisacionnan constructivo den nos comunidad, teniendo cuenta cu competencia di nos organonan constitucional. Sindicatonan lo aporta den un dialogo constructivo pa duna mas contenido na diferente puntonan di maneho.
- ▽ Gobierno lo haci apelacion riba Parlamento pa pone fondo disponibel pa formacion di cuadro den sindicalismo.
- Gobierno, sindicatonan y gremionan den sector priva lo coopera pa concientisa nos comunidad pa loke ta toca respet pa nos leynan vigente y competencia di tur nos organonan constitucional.
- Gobierno, sindicatonan y otro gremionan lo percura pa mantene tur ley vigente y lo ehecuta tur decision di huez.
Gobierno, di acuerdo cu nos leynan vigente y su responsabilidad pa bienestar di nos comunidad lo percura pa introduci y mantene normanan di etica den sector priva y medionan di comunicacion. Sindicatonan lo duna nan aporte na esaki.
- Teniendo cuenta cu e actual **Nationaal Platform Calidad** lo termina cu su tarea pa asisti y vigila implementacion di e recomendacionnan di Rapport Calidad, Gobierno lo institui un comision nobo den cual ta inclui representacion di sindicato y otro gremionan pa sigui asisti y vigila e proceso di aumenta calidad den gobernacion.